

太上一乘海空智藏經卷之一一名七月一

序品

爾時海空智藏見元始天尊遍遊他土至極樂國妙嶽之山安坐正心在羣林之下與諸弟子千三百人皆得洞觀了達無礙於一瞬間能達三界所有種種森羅萬象山川土地六道四生有識無識皆悉通照大明轉輪皆悉達慧包含異族混合衆生等視萬類皆悉空寂澄悟玄漢守靜篤思端居思微萬邪不入其字號曰上智童子光妙童子真定童子仙卿童子如斯等輩以為眷屬

爾時國西有一大城號為寶乘周而圍繞四百餘里此城莊嚴世界第一比於八方華麗特甚地勢平正無有丘坑山林險阻多生甘果樹木枝條兩兩相對花實芬芳四時鬱茂彩色葳蕤如七寶林微風一起聲響雅韻預聞音者泃然悟道此城之內人民殷盛連棟比門門無空闕常以三時說至妙理所謂一切三世諸法如吁如呵如噓如吹如呼如吸悉無可保如是等例數千億衆共為眷屬

說之聲喧動天地是城西南有一真士年二千歲形貌端正獨絕無侶資財珍寶饒益一城智慧神通自在如意常自端然處一樹下每至日中無量无邊一切時衆稽請所疑爾時真士一一剖析莫不歡喜頂戴而去如是教化積有年稔宣揚至理無處不及乃至一切禽獸衆生亦蒙度脫既為萬物之所宗重國王及妃后並皆禮供威德巍巍天人罕匹是城中人共名真士為海空智藏所以爾者言此真士其身如海其心若空理包物外是為智藏既聞天尊至此國土心大喜悅而作是言此國內人皆非我敵凡諸言論不足激揚我常思惟或有所滯無處訪察每以斯事歎息良久今聞天尊智德無上神通特遣形相秉發光色晃耀一言出口萬坐咸服誘接衆生未嘗懈退所歷國土皆能利益我聞其聲久願禮拜今當命駕直詣其所諮所未決即勅弟子具諸車乘皆使齊整勿令陋劣我至明晨當謁智士即於爾時有一弟子名曰發疑前起白師大德何為妄生下想此是何

謂忽有斯言大德於此智力無比非直一國王及臣民共來宗仰三界之內亦可稱歎何為自賤造人求法我等寧能戴此形面從師乞出咄哉大僻願勿復說如此處行是時師答發疑賢士汝勿執著譬如有人處在高臺俯望臺下見於萬姓悉不能及是諸萬姓在臺下者舉首高望義絕飛昇臺上之人自以最高人無及者即發意云今在於此窮為高頂最勝无極即生是想不知其上乃至有於二十八天三清玉京懸極无量臺下之人唯見此高既知此高不知其上乃至有於二十八天三清玉京懸極无量臺下之人唯見此高既不能及言無勝此亦生劣意我今去此甚自隔絕如別異國亦不為異適得及之於須為足如此二人俱為失中我今智慧勝此臺上自高之人汝今何為同此臺下劣意之士彼若劣我我往詣彼無失名稱彼若勝我我今著行是獲大利何為謂此乃為非理是時發疑聞斯語已心開意解即辨行供養蓋與馨香花伎樂種種妙寶不可稱量於日將

中登輿而發賓從弟子五萬人俱皆有大智深達法源明了空相所謂空相不空相無我相不定相故不實相故如是諸相一一弟子亦辦諸寶種種行侍與師同俱共就道到於山外息駕而止逍遙吟詠仿伴澤中是大衆中有一弟子名曰大慧即前長跪參承其師路既稍遠跋涉山林得無疲弊弟子今日欲有所啓唯願大師聽採鄙言大師答言隨汝所問我當察聽大慧即云大師盛德天人罕測萬物崇敬如事父母群心歸依以為大岸論議言說為人模範出吐辭文不可輕脫若見彼人弟子先乞與其論議若得抗衡師便嘿然聲稱隆重不勞往復自獲重名此義寧不爾時大師即便答言如汝所說無以異也既入山中遙見天尊先明挺持如金剛王光曜山中如日初出威光猛盛堂堂容止驚駭視望智藏師徒皆悉愕然或有晦遁或有欣躍或有戰懼或有羞慙生種種心發種種意既行到已各下車輿依次而坐人人惴恐如有所夫良久已後天尊開顏欣然似笑是

諸眷屬微得開解氣息平正智藏弟子大慧賢士即起而前對天尊立作禮脩謁訊訪寒溫山中飄泊得無損和於是天尊訓答既畢又復自言我聞大德神通自在才辯无礙能悉解人久遠劫事又如人心所求所欲智慧照察无邊无礙是以是人號為天尊我等今者欲有此諮唯願廣說爾時天尊即答大慧善哉善哉善男子道汝所言爾時大慧即白天尊一切法中何者為最得道果何者為最得智慧何者為最得神通何者為最得寂滅无為无礙最上第一是四道中修因云何若為差別所獲不同成就各異唯願分別曉了解說我等眷屬及與國人當共修行爾時天尊即答大慧善哉斯問善哉斯問如此問者皆必能為一切世人作大橋梁作大舟楫作大寶車能致世間昇於如士我今為汝分別解釋使未聞者咸得聞知皆獲度脫汝當諦聽善分別之善男子夫三界人行各各不同有躁有靜有愚有智若有愚者非昏鈍愚

若有智者非妙感智躁不恒動靜不恒止從多而論有勝有劣就偏勝中因之為名是為躁人是為靜人是為智人是為愚人就此四心或智而躁或愚而靜有智而躁如此輩人不得道果所以然者智既未圓躁加其動於此小智多有所之心既不定善惡難存故不得道何謂道果果有五種一地仙果二飛仙果三自在果四无漏果五无為果是五道果用心雖別同趣一源若修此果當用靜心靜心專一所習必成何謂所習夫五果者習於五事學者當知五事因緣用心所趣若人修行服食休粮研精道味志慕山林隱形栖遁餐霞納氣素於甘腴捨去肥膩身體勁免於老死是謂地仙若人生處豪富貴所居華麗身無疾惱長齋蔬食捨離姪慾是謂地仙若人生世氣力堅猛心遊道本不食眾生行慈悲法年命得壽百二十歲是謂地仙若人悉力求地仙者當須積學用心堅固若服食者中廢則疾若道林澤中廢則危心慮廣者不得守一心慮淨者不得沉靜不一之心

不靜之念是則不能長居名嶽餐漱松流是知地仙最須靜念雖復愚庸不習經典但能修行如上法術則能獲得地仙之果善男子若復有人行十善業守護戒行未嘗缺犯端身正心休糧絕穀善持六根不染垢汙行業

模准不起表裏遊踐名嶽餐餌雲霞脩如此術是謂飛仙以何心力而得飛仙亦須靜心堅固不動其心質直雖不廣覽大洞妙音而專心力守持淨戒如瑠璃珠內外明徹修如上術則能獲得飛仙之果善男子若復有人善達禁戒種種威儀身心所行冥表規矩天人崇仰莫不供養神力變化應現無方志意所之莫不畢遂不餐藥餌自然飽滿若欲食者應念而至於此世間形慮自在遊行山澤得無懼心能保遐年而無疾惱是謂自在以何心力得自在果當修智業亦須靜心形雖感起心如山嶽不動如地雖不具得智慧上法而修智因終不懈倦習行神通思微定志於思微中能分身形應赴无量若能通達此諸術者是則獲於自在之果善男子若復有

人於一切法照了通達於他心行分別巨細無有差失亦能悉照諸天所行善惡業緣叢變之相動止云為皆能利益无量大眾若有可度即時應念悉令解脫常修戒行及諸妙典一切道本靡不畢詳能入一切神通之門能入一切智慧之域亦能入於空有之際大上大道所有經典悉皆受持無復煩惱所謂種種煩惱不正見煩惱不正信煩惱貪瞋癡煩惱悉皆捨離無復愛著所謂五種愛著眼愛著色耳愛著聲舌愛著甘鼻愛著香身愛著細滑如是諸著悉皆無餘六入清淨所謂六入眼耳鼻舌身意如此諸根所納所思決定皆是三洞與典復有外結所謂三結一者欲入法地不明為結二者欲從法侶障礙為結三者一切行願不成為結如是結果永能除斷無復遺餘心得豁然無漏果以何心力得無漏果當修智慧種種神通雖不全得太上无量智慧之門並皆進習思微定志曉了照達辯才說法能度世人於一生內及至未來終不退轉漸漸階梯至无上道不復為

速若修此術則能獲於無漏道果善男子無為果者即是入寂無上法門所以爾者寂境即是無為無為即是寂境何謂寂境不生不死故能長生不毀不變故能應變無為即是有為有為即是無為以無為生有為以有為入無為寂境即是感應感應即是寂境以寂境生感應以感應歸寂境寂境即是妙有之源係言為有不得同無既不為無亦不為有是為無為無為之說非有境界故謂無為以何心力得無為果當修種種智慧種種神通圓備眾行具足天人最勝非有非無亦非非有亦非非無無所見故則以為無有所應故則以為有是則無為最上之果復次善男子大慧已得大智慧本由習三相所謂三相有相無相非有非無相若照此相則得入於智慧之源夫觀三相舛越不同自有眾生從有相觀入至無相自有眾生從無相觀入至有相自有眾生神意凝然非彼二相而得觀見有無之相善男子若有眾生作空學人恒運其心從有觀無而樹意言我見

萬物今雖見有必歸於無當知一切盡是虛無非有實事無湛然慧無觀空慧無應感慧當知此人是為斷見雖似智慧而乖其宗善男子若復有人恒運其心從無觀有而樹意言即此世中皆從無生向本無此而今有之有何緣生必因於無是知無中皆悉有以有有故一切無無當知此人是為狹見雖似智慧而失其宗善男子若復有人恒運其心從非有非無中觀於有無常樹意言即世眾生悉皆非有亦復非無所以爾者若言有者則終歸無若言無者今見則有若必爾者則為不定不定業故不得出生人天果報當知六道形有則有形滅則無若作此觀是為或見非謂智慧如此三見失智慧本善男子若復有人觀於三有作如此心觀一切無即是寂寥不能生物豁然不動不能感應善男子譬如大山善能興雲雲能生雨如此等例從有出有決定當知无不出无又復觀有即著形質即此形質是有實有離此形質无處名有又復觀於非有非无善男子譬如風聲聲

響遍徹如此等例風質非无執不可得若言實有又非礙著響亦如是應知此例非有非无若有學人作此觀者亦皆失於智慧之本善男子若復有人觀於三相作四種意妙无妙有麤無麤有明此四意自然能見非有非无何謂妙无即是道性以何因緣道性之理自為妙无以淵寂故以應感故若以住於淵寂之地觀於諸有則見无相若以住於應感之地觀於諸有則見有相善男子若言道性全為无有中應感若言道性全為有者而實寂泊以是當知道性之有非世間有道性之无非世間无是謂妙无何等因緣觀於妙有即是應感法身之端嚴茂發起超絕三有雖有其質不得同凡以是因緣謂為妙有善男子以何因緣觀於麤无麤无即无无感无應空處寂漠豁然而已謂為麤无善男子以何因緣觀於麤有若麤有者即是質礙以礙著故謂為麤有善男子若能善知遍此四意分別體相當知此人已能得知非有非无以何因緣而得知之即尋道性義則可求若有

學人習觀三相了此四意則為入於智慧實城遊智慧室坐智慧林餐智慧食是得智慧機相之本復次善男子善哉大慧得神通力由習思微之義淵博難辯以是緣故謂為思微一切眾生得神通力莫不由此若得大定運此神力如風扇火一念之閃莫不俱休當知思微能生種種神通之慧有二神通何謂為二者挺然自有神通種種照了能知能見觸機便發不假入定自然具足於倏忽頃生无量變從心自在未嘗違意如此神通為最上力其二神通因思微生入定而有若不入定則不能生種種變化是為次力而此二通皆藉思微以得具足積習既久是故疑然而自通變若有學人求神通者當應善念思微之道得為神通變化之源復次善男子善哉大慧求於寂滅无為无礙皆由備諸善念之行具足感神成就種種无量功德修行无量一切道本神力自在通達變化體相微妙如淨瑠璃一切天人有感必

應濟拔四生莫不度脫是謂道本智慧之源
是為寂滅無為無礙以何因緣謂為寂滅善
男子夫寂滅者非空豁虛以其豁虛不染三
界行超物表一切諸法所不能動是為寂滅
善男子夫無為者一切萬物不能為其作動
用事其色澄漠其質淵玄是謂無為善男子
夫無礙者一切萬物不能為其作障礙事其
感通微其力周普是謂無礙如此四道寂滅
為最是故學人當脩如是種種功德

爾時大慧聞是語已生大敬仰心合口言吐

哉大德辯才通達自在無礙能使我心開發
智慧實為快哉又復白言大德天尊威神若
此得無畏力得大神通能濟凡賢入於正道
遊行三界最上无匹今日稱服與我師等即
解上服寶導珠璣以奉天尊白言大德願受

我獻以表丹誠是時

天尊答大慧言吾今處此深山窮谷不勞如
此珍麗之飾无容空受以為過費大慧又言
夫聖人者應現世間心不華薄及其源故出
現此身何為沉隱處在幽谷今欲請觀遊行

弊國所以逆獻如此服耳爾時

天尊默然不受即於此時化作三萬六千白
玉導青珠璣三萬六千黃金導綠珠璣三萬
六千瑠璃導白珠璣三萬六千碼碯導黑珠
璣三萬六千琥珀導黃珠璣如是導璣遍滿

座下不可稱數即語大慧汝見是中眾大
導及璣珞不答言天尊甚見甚見此中何緣
遂生如此諸寶導璣哉神通致此興盛奇
哉天尊瑞相炳發爾時

天尊答大慧言我現於世當為一切閻冥眾

生作大導主決定能導无量眾生出生死海
何況如此寶導之珍安足為怪即以神力收
諸寶導共作一導如此一導徧滿虛空明相
照耀不可稱說海空智藏及其眷屬咸皆敬
伏莫有發言

爾時眾中有一弟子名曰上足稽首其師白

言大師我隨大師數百餘年曲蒙恩慈昇堂
入室未嘗暫見如此神通瑞相之異而此大
德云何頓爾踴躍讚歎唯願大師奮其智力
示現異相令彼會眾見者讚歎

爾時海空智藏答上足言汝勿高慢生求勝
心所以者何天尊巍巍光相挺持豈是世人
所可比校能與齊等吾今或可更詰所疑以
自決判寧容輕以微薄神通自生誇大汝勿
復言

爾時眾中復有一人名曰妙思即前又手禮
天尊足舉言問曰我雖愚鄙欲有所諮唯願
大德垂哀賜示
天尊當爾答妙思言善哉善哉隨汝所問我
當為汝事事解說皆令開解

妙思白言大德聖師一切萬物以何因緣得
生得死有愚有智有大威力有大美貌或貴
或賤或无容儀或為人敬或為人輕如此種
種不可終紀為當樹因感得斯果為當脩行
致此業報進退思量難以明驗唯願垂慈少
降矜答爾時

天尊答妙思言善哉善哉善男子大學賢士
善能發此深奧之問我今為汝一一解釋令
无疑滯妙思當知譬如有人臨空而語聲響
彼谷反應无差若作鄙言響還即鄙若作善

言響還即善若作歌聲響還即歌若作哭聲響還即哭若作大聲響還即大若作小聲響還即小若作中聲響還即中若相召喚如此種種不可數量隨語發聲應聲還聲千千萬萬終不差跌善男子夫人生世種種善惡亦復如是皆由前世宿業所行得感得果與此響還等无有異若其前世行慈悲心救度一切此人今生得大威德人所尊重若人詎毒无慈悲心此人今生无有威容人不敬愛若其前世供養三寶修於施戒精進忍辱思微智慧如此等通此人今生得惠業力得神智力得无畏力備諸善本善男子若其前世普濟衆生則得无病長壽之報善男子若其前世侵宮衆生則得疾惱短天之報如此感果數千萬億不可悉記皆由前世業因所感感得此報如響隨聲等无差異

則報大如規如矩如繩如墨皆相應赴分毫不差妙思當如善惡之生由如影響不離形聲爾時妙思聞如此語即生一疑乃整衣巾端心正慮重白天尊大德聖師響應聲還誠如妙說若深山邃谷林障重疊如此之處發一小聲響還極大若小屋小器如此之處發一大聲響還猶小以何因緣聲俱不異而應有差又如空地雖發音聲而无響應云何此處徒發巨聲？無應者若推此事當知作是罪因福因同等不差或得大果或得小果或不得果猶如發聲發聲之始大小是同報響之聲隨處而異又如形影形值斜光其影即長形值正光其影即短形不值光其影不見以是因緣形不為殊影則長短有无之異若推此事作是福因作是罪因同等不差或得長果或得短果或不得果大德今者譬諸影響理无如此若不如此則非真喻大衆疑惑願垂解釋爾時

疑方便利益不可限量今當諦聽善思念之汝今問我所行不異得報有差其理實爾如汝所說如汝所說所以者何若有世人斷害人命斷害是一人命不異若害真士善人道士有德之人罪大深重所以者何如此等人為人師範利益衆生解脫一切出生死苦若无此人一切衆生則為不免三塗八難苦惱之弊斷此人命則為俱斷衆生善根以此而言罪大加倍若殺五逆凶害懷惡如此等人得斷命之罪不得傷善之報以此為言罪報輕小此此二途斷命是一得報不同猶如聲發聲發不異隨處應響大小不同又如布施善能供養皆是福業等无有異若施真士善人道士有德之人福報大重所以爾者如此等人皆為世間宣揚教化度脫衆生利益萬物若施是人則是為施一切衆生法橋之梁求道之徑當知得福不可限量若施凶害四重四病五逆之人施則是同得福不定若作慈悲心施得福猶不及於施與善人若作周給一切惡人心施讎大得罪不同所以者何

長養一切凶惡人故長養凶惡則害萬物是為此施同害萬物以此而言施雖未殊得報有異善男子猶如聲發隨處應響大小不同又如殺人作无記心若殺人者不挾忿怒不生快樂直害其命不生善鄙於其中間如此得罪微為小輕所以者何心无毒故猶如空處發起言聲非无響應由其響微不聞於耳亦如无記作罪眾生非不得罪罪不過彰又如布施作无記心若布施時不發廣濟心不發救度心不生慈悲心不生歡喜心不生嫉妬心不生勝人心不生夸大心不生思德心亦不生怯愛心如棄糞於大海中當知此人得福微薄所以者何无善心故猶如空處發起音聲非无響應由其響微不徹於耳亦如无記作福非不得福福不過彰以是因緣如汝所說不為差異是時妙思聞是說已豁然開悟心无疑結得達解轉退坐本處歡喜踴躍是時坐中復有一人名曰最勝威德堂堂超拔眾侶海空智藏第一弟子已備十轉所謂无憂轉淨心轉釋滯轉通儒轉達解轉善

見轉權物轉了機轉大明轉具足轉復有神通所謂眼耳鼻舌身手復有辯才所謂通意辯解煩辯斷惱辯達相辯窮幽辯具諸上智上為一國人頂戴宗奉即離席起到天尊所致敬作禮端身正視一心不倦白言天尊我常習學功積多年專心思惟識悟妙理欲有所諮未敢先發今見大慈及與妙思啓問所疑天尊慈愍降垂辯答析理分明聞者即悟无復滯惑我大歡喜不可限量譬如有入經遇篤疾忽然一旦平復如本我今歡喜亦復如是又如有入早離父母一旦不期遇相逢值我今歡喜亦復如是又如有入積日大饑一旦之間逢諸美饌我今歡喜亦復如是唯然天尊竊有所疑譬如有入患諸重疾枕卧牀席飲食不能氣命无幾忽於空中得甘露藥盈滿一卮欵在頭首其人大驚疑是鬼毒妖災所降又復疑是神明所賜當欲飲之進退未敢忽於空中有一善神發聲唱言是大妙藥可取服之疾者聞已方大歡喜取藥而飲病便除瘥我今亦爾疑滯既久聞天尊說

既未善解分別其相心懷狐疑未敢便受若更聞決心即通達曉然无疑亦如有人欲之彼國隔大河流翹望彼岸渺然萬里愁苦屏營不能自抑善濟神王忽於岸邊化作一舟篙撒行具觸事无之中心有一人語欲度人汝可入此當載汝過其人即驚我在此久多時覓船終不能得那忽今日陡然化有當是鬼魅誘我入水若是化惑後必生害我寧止此卒於性命脫失計去死悔无及即於爾時善濟神王化作飛仙於雲霞間高聲唱言此是善神欲濟汝命度去无嫌是時此人得聞斯語心大歡喜安隱无量便入船中直過彼岸我於今日亦復如是聞天尊說无上妙法不能曉了心懷猶豫若更聞決无復疑悔天尊大聖若知我心有所疑者賜為開釋我則泰然无復結滯爾時天尊告最勝言善哉善哉善男子我今知汝心之所疑汝心疑言一切眾生皆因前業獲得報身身行善惡及與業緣悉由前因之所建立譬之形聲感果影響若无形聲亦无影

響若如天尊今日說者一切衆生有識之初未有善惡云何得因生於善惡好醜之異貴賤之殊汝心如此結疑以不爾時最勝聞此語已驚服嗟嘆心大戰慄口不能言如此良久天尊乃言如汝心不最勝答言大聖天尊

今日方知一切世間有大智尊有大明者慶此世間得最上師得大導師得大舟航得大慧眼得大法城一切世間今者當得免離怖畏免離五趣免離愛慾免離悲憂免離三障免離垢濁免離一切結業我今大慶无有限量我向實生如此疑滯唯願天尊分別顯說我既釋然亦能利益現在未來天人大衆爾時

天尊高聲唱言今來大衆當諦專心聽我所說如是三唱今來大衆當諦專心聽我所說勿生懈怠勿緣他事即此座中有大真人名曰最勝心生疑滯如我所說我今爲其分明析理是以汝等宜善採察得大善利不可思議不可思議最勝當知夫一切六道四生業性始有識神皆悉淳善唯一不雜與道同體

依道而行行住起卧語嘿息皆合真理如魚在水始生之初便習江湖不假教令亦如玉質本白黛色本青火性本熱水性本冷不關習學理分自然一切衆生識神之初亦復如是稟乎自然自應道性无有差異云何而生種種惡緣地獄餓鬼畜生等報當知皆是六根所引何謂六根眼耳鼻舌身意眼根因緣著諸色觸色相攀緣其理不一種種諸色皆入眼根以是緣故眼根生漏漏既互生生於无量无边諸法或善或惡以不定因生於

惡果耳根因緣亦復如是著諸聲觸聲相攀緣其理不一種種諸聲皆入耳根以此緣故耳根生漏漏既交生生於无量无边諸法或善或惡以不定因生於惡果鼻根因緣亦復如是著諸香觸香相攀緣其理不一種種諸香皆入鼻根以此緣故鼻根生漏漏既互生生於无量无边諸法或善或惡以不定因生於惡果舌根因緣亦復如是著諸味觸味相攀緣其理不一種種諸味皆入舌根以此緣故舌根生漏漏既交生生於无量无边諸法

或善或惡以不定因生於惡果身根因緣亦復如是著諸細滑身相攀緣其理不一種種細滑皆入身根以此緣故身根生漏漏既互生生於无量无边諸法或善或惡以不定因生於惡果意根因緣亦復如是著諸攀緣以

攀緣故其理不一種種攀緣皆入意根以此緣故意根生漏漏既交生生於无量无边諸法或善或惡以不定因生於惡果最勝當知三塗所起由於六根六觸六情六染是四大結能生種種善惡業因增長三塗種種苦惱能收无始一切善本以是緣故一切衆生初由六根種種過患過患既生緣起不滅汝等當知六根爲災不可限量是故學者應當檢肅六根不可放逸攀緣諸相說是語已坐中又有一大真人名曰決理即起於坐往天尊所頭面至地稽首作禮白言天尊今者說言一切衆生有識神初淳善不雜行必合規動應真理進退俯仰行住起卧莫有失節一一諸法皆合道宗无有差異若如此者衆生所見及與所聞動止所爲云何得染麤穢之事

天尊譬如冰寒之堂淳以冰凍而為梁柱牀
席屏帷莫非冰結就此中間云何得火云何
得熱煩惱之患一切眾生識神之初亦復如
此相與既善淳一不雜六根所染云何為非
云何習惡致招罪果又復天尊譬如瑠璃照

徹内外表裏中間无有穢玷識神之初亦復
如是本既為善所習復善云何獲惡種種果
報又復天尊譬如百和之香共在一篋此篋
之內芬芳流溢无有一毫臭穢之氣識神之
初亦復如是本既香潔淨穢无方又復天尊
譬如日光吳發明照於其中間了无闇黑識
神之初亦復如是本既曉了明味云何猶復
并用我今有疑世間不容於善法中生无量
惡唯願大德為我解說令諸眾會悉皆泯然
離諸疑滯爾時

天尊安詳答言決理真人如斯切問不可思
議汝等已曾親近无量无边一切真人供養
无量无边一切天尊通達大智曉了无礙故
能發此微妙之言我當為汝具實解說汝等
諦聽勿生疲怠決理大真夫人心法不得全

以譬於冰凍瑠璃香等所以爾者如此物等
皆為靜法其質安謐不能變易是以其體不
能生他以靜因故外物不入此譬為異若喻
日者是義或同所以爾者日不恒明體不恒
正有時薄蝕有時具隱心法亦爾遷動不定

染滯所驅貪著利已樂善已身眼貪善色耳
貪善聲鼻貪善香舌貪善味身貪善觸意貪
逸樂皆為苦受若作所貪最為苦受所以者
何眼貪善色各隨人心生種種想假使恒得
則損心慮唯知貪愛忘去善本若不恒得生
種種求種種計度或見人善色願已皆得如
此等輩直置自生无量苦惱况復所求不即
稱遂耳貪善聲各隨人心生種種想假使恒
得則亂心慮唯知貪愛忘去善本若不恒得
生種種求種種計度或見人善聲願已皆聞

如此等輩直置自生无量苦惱况復所求不
即稱遂鼻貪善香各隨人心生種種想假使
恒得則弊心慮唯知貪愛忘去善本若不恒
得生種種求種種計度或見人善香願皆聞
其氣如此等輩直置自生无量苦惱舌貪善

味各隨人心生種種想假使恒得則煩心慮
唯知貪愛忘去善本若不恒得生種種求種
種計度或見人善味願皆入其口如此等輩
直置自生无量苦惱身根貪觸著於細滑各
隨人心生種種想假使恒得則惱心慮唯知

運心愛習染輒忘去善本若不恒得生種種
求種種計度或見人善質願皆附已身如此
等輩直置自生无量苦惱意根不定攀緣諸
想一切諸緣皆入於意纏著諸根往還不息
若皆從意則生驕逸若違於意則生瞋恚以
是因緣直置自生无量苦惱况復當知一切
世間恬然安靜不修勝業不念真道不行六
通无上智慧不喜精進樹諸福因恣於六根
六情所引自然墜於三惡道流所以爾者六
根六染能生无量種種罪因不可勝記以是

因緣識神之初非習凶惡招於罪果非以見
惡生於罪果非以聞惡生於罪果直以六染
自生諸過漸漸增長遂生地獄畜生餓鬼无
量種因決理當知過去之世有一國土名曰
法地此國豐樂如欲界天人人民无量並皆安

樂常脩妙道三洞之說莫不習誦此國有王名曰制頂其王明了得大神力行坐起卽種種變通忽於一時卽於座前生一蓮花千葉歲蕤光色晃耀制頂大王驚愕而起禮拜此花須臾之間花葉之內生一童子年時大小堪五六歲端正獨絕三界无雙王既見是便卽命抱養名曰化生至年成長智慧日隆神通自在无有罣礙无量國土莫不齊服所求所願莫不備具制頂大王尊其威德巍巍无量乃自禪位授與化生臨國一切天人並皆快樂恭敬尊重无有疲厭忽一日集會大臣及諸眷屬國師道士玄儒衆學言讖講論以日繼夕化生大王高聲唱言我今此土一切自在快得安樂无復衰得我聞東方有一國土名大堂鄉納善世界雖聞其名未見其形欲與卿等俱共履歷徧觀風教及與人民可爾以不是時諸臣同聲答言大王神通自在无礙徧欲詳覽復有何疑臣等亦願承藉威靈同得省察彼國奇異卽於是時不起于坐以神通力超然而往與諸大臣及宮殿俱就

到彼土納善國王命駕出迎遙見禮拜問訊起居共送入城設大高座其座高廣不可限極非是世間所能籌算化生大王升之而坐普放光明作諸神變於國土中化作四百億萬明珠寶幢一一寶幢長四萬里於寶幢上有大光明照耀明徹日月之耀翳然无用一切人民見此光明皆生歎訝咸自謂云如何國中忽有如此大異之相五五三三共聚論釋未能詳辯是時化生震大雷音唱言衆人可乘此光來入王城發此語已普徧國界悉得聞知因聞此聲各各尋明到其王所正見化生在高座上莫不頂禮恭敬而立衆集既竟化生大王高聲唱言衆會當知一切法性不可恒守皆應毀滅隨緣而去勿云此土快樂而可安故有美國勝此无量若脩善業必得往生卽授國人十善之戒所謂不殺不盜不淫不飲酒不妄言不綺語不兩舌不惡口不貪欲不瞋恚若能堅持如此十法當知必得往生妙土說是語已大衆歸依咸皆受持終身不缺納善國王亦得神通淨心妙轉教

化既畢輕舉而歸過歷國中處處究悉既還本處問一大臣名曰達見汝向隨我至納善世界有何所見今可廣說達見答言大王當知我向侍從察望彼國見彼國土地平如掌无有砂礫種種雜果行列齊平如繩如削一切人民皆食樹實形容端正少有疾苦城闕宮殿皆多青色譬如朝雲覆青山上推尋此處不勝茲土化生大王告達見言汝又何見達見又言我又見有明珠寶幢此是大王威力所化非彼國土真本所生若止如此不足可願化生大王答諸臣言且各消息當復更廣遊諸臣聞是退還其位嘿然拱坐

太上一乘海空智藏經卷之一